

Communicaziun a las medias dals 5 d'avrigl 2022

La BCG construescha a Cuira la chasa da clientella dal futur

La Banca Chantunala Grischuna (BCG) modernisescha sia halla da clientella en la sedia principala a la Piazza da la Posta a Cuira e sa focussescha en l'avegnir anc pli fitg sin la cussegliaziun. Durant las lavurs da construcziun da la fin da matg enfin la fin d'october 2022 porscha ella ses servetschs en in provisorio en il sector d'entrada. Pajaments als bancomats èn pussaivels durant 24 uras a di. Cun la reavertura serra la BCG sias filialas a Cuira a la Ringstrasse ed a la Lacuna, dapi il schaner 2021 en funcziun sulettamain pli sco fatschentas da spurtegl, sco era sia agentura a Trimmis. Ils bancomats restan ad interim.

La clientella profitescha a partir da l'atun d'ina cussegliaziun pli approfondada, e quai en in lieu central. Tut las spezialistas e tut ils spezialists èn reunids en l'avegnir sut in tetg e cusseglian a moda cumplexiva davart temas d'investiziun e da provediment, la fatschenta d'ipotecas e da credits ed ulteriurs basegns. «Nus concentrain a Cuira l'entira cumpetenzza da la BCG en in sulet lieu e creain a la Piazza da la Posta ina chasa da clientella moderna e multifunziunala», declera il commember da la direcziun Thomas Roth.

Novaziuns en la sedia principala a Cuira

Ils ultims onns ha la BCG transfurmà tut sias diesch sedias regionalas, tranter auter per s'adattar als novs basegns da la digitalisaziun. Pir il november da l'onn passà ha ella inaugurà l'edifizi nov a Tavau Plaz. Il punct final da quest project è la halla da clientella a la Piazza da la Posta a Cuira. L'entschatta da mars è crudà il culp da partenza cun la transfurmaziun actuala da la zona d'autoservetsch. Ils proxims mais vegn realisada en la sedia principala ina banca da cussegliaziun cumplettamain nova. Quella s'orientescha al concept da filialas cumprovà cun ina cussegliaziun rinforzada senza spurtegl classic. Ultra da quai creescha la BCG in local spezial che serve a la clientella ed al personal per lavuratori e preschentaziuns cuminaivlas davart temas finansials.

Concentrar la cussegliaziun sut in tetg

«En connex cun questa investiziun avain nus decis suenter ponderaziuns approfondadas da serrar la fin d'october las filialas pli pitschnas a la Ringstrasse ed a la Lacuna a Cuira sco era l'agentura a Trimmis», declera Thomas Roth. Quai permetta da reunir e rinforzar la cussegliaziun en in lieu central, explitgescha Roth vinavant. A questa decisiun contribuì ha er il fatg che la maioritad da las clientas e dals clients sa lascha cussegljar a la Piazza da la Posta dapi il schaner 2021. Ultra da quai reglan els blers affars da banca simpels adina pli savens online. La consequenza è che las transacziuns al spurtegl èn sa reducidas ils ultims onns per passa 50 pertschient. Ils bancomats en ils trais lieus restan ad interim.

En il center stat la cussegliaziun persunala

Tut las collavuraturas e tut ils collavuradors da las filialas a Cuir e da l'agentura a Trimmis lavuran a partir da la fin d'october a la Piazza da la Posta. «Cun sa concentrar sin in sulet lieu avain nus dapli pussaivladads da porscher ina cussegliaziun cumpetenta e confurma als basegns», sa legra Martin Gartmann, manader Clientella privata & ipotecas. «Discurs da cussegliaziun cun la clientella a chasa èn sa chapescha pussaivels vinavant, er ordaifer las uras d'avertura», accentuescha Gartmann l'impurtanza dal contact persunal. La BCG ha cun passa 40 [agenturas](#) anc adina ina da las raits da fatschentas las pli spessas da la Svizra.

Soluziuns digitalas per duvrar a chasa ed en viadi

La BCG investescha cuntinuadamain en novas soluziuns per che sia clientella possa reglar ils affars da banca a moda cumadaivla ed independentamain dal temp e da lieu. En il center stat la marca da tetg digitala «BCG Gioia» che vegn amplifitgada pass per pass. Quella permetta actualmain da planisar la pensiun cun far pajaments en la pitga 3a a moda simpla cun agid d'ina app. La soluziun electronica «Digital Payment» pussibilitescha da pajar en l'entir mund a moda mobila, svelta e senza contact. Ed en la filiala digitala pon las utilisadoras ed ils utilisaders reglar lur affars da banca, empustar daners svizzers e valutas estras e schizunt sa laschar trametter tut gratuitamain a chasa. Dapli davart la purschida digitala sin gkb.ch/gioia.

Contact:

Thomas Müller, thom.mueller@gkb.ch, telefon +41 81 256 83 11

Daniel Daester, daniel.daester@gkb.ch, telefon +41 81 256 88 01

Banca Chantunala Grischuna, Medias & Investor Relations, chascha postal, 7001 Cuir
medien@gkb.ch / gkb.ch/medien

Banca Chantunala Grischuna.

La Banca Chantunala Grischuna porscha tut quai ch'i dovra per ina banca universala moderna – per persunas privatas, l'economia ed il maun public. L'interpresa cun sedia principala a Cuir è represchentada en passa 40 lieus en il Grischun. Cun var 1'000 collavuraturas e collavuradors è la BCG ina da las pli grondas patronas en il chantun. Sia attaschadada al Grischun exprima ella en differentas modas. Ultra da sias activitads economicas s'engascha ella cun ses sponsoradis, ses fond da contribuziuns e sias purschidas per lavur voluntara.

La BCG dispona da participaziuns da maiortad a la Banca privata Bellerive AG a Turitg ed a l'Albin Kistler AG a Turitg. Plinavant sa participescha la BCG cun var 30 pertschient a l'interpresa per l'administraziun d'investiziuns Twelve Capital Holding AG. Il scrit da participaziun BCG è quotà a la bursa dapi il 1985.